

INDIA NOVA

Notam Indiam tibi lector in ista tabula exhibemus cum infinitis insulis. Dico nouam, quod longe post Ptolemæ ab Europæis hominibus fuerit illa extrema orientalis regionis portio cum annexis insulis inuenta. Calicut uero, Canonor, Cambaia, Narsinga, &c. regiones sunt non nouæ, quippe quæ ueterebus, quoque fuerint cognitæ, sed noua nomina, & quæ nouo nauigationis itinere nostro tempore cœperunt adiri. Nam ut in tabula nouæ Africæ scripsimus, Portugallenses hodie circumuehūt totā Africā, & per angustias maris rubri uelificant in Orientē ad Ormum insignem insulam, ad Cambaiam & Calicut nobilissimum emporium, ubi totius Orientis cōfluunt mercatores, comportantes omnia aromatum genera, cinamomum, piper, gariophylū, zinziberim, thus, lacham, ligna sandali, nuces muscatus, camphoram, pannos sericeos omnium generum, margaritas & lapides præciosos uarij generis, muscum, aloē, &c. Nascentur autem in Calicut & regno Narsingæ piper, zinziber, cardamomum, myrobalanum & casia; reliqua aliunde importantur. Spicus nardus & myrobalanum ex Cambaia & uicino regno Cuchino aduehuntur. Asportat quoque inde bombix & sericum in magna copia, sicut & de regno Pego. Inuenitur etiā in eo regno onyx, calcedonius & adamas. In Ormo insula leguntur uniones in magna copia. Zaylon insula mittit rubinos, hyacinthos, saphyros & topazios. Regnū Malaqua seu Malacha, mittit sandaliū, psitacos, elephantes, pardos, &c. Sumatra insula miram habet copiam piperis & serici. Camphora arboris cuiusdam gummi, in Porne insula inuenitur. In insulis uero Monoch & Bandan haud multum à Porne distantibus, crescūt nuces muscatæ & gariophylum. Insula Zipangri plurimo abundat auro, & ingentibus pollet diuitijs. Insulæ Petan & utraque Iaua, maior & minor, proferunt magnam copiam piperis, nucum muscatorum, spici, galangæ, & cæterorum aromatum. In Madagascar insula plurimi sunt elephantes, & idcirco magna est in ea præciosi eboris nundinatio. Sunt etiam in ea multa nemora sandalorum. Huic haud dissimilis est Zanzibar insula, abundas leonibus, leopardis, & alijs uarijs bestijs syluestribus. De maximo imperio Cathay, de prouincia Mangi, de urbibus Quinsai & Cyamba, multa habes in secundo & tertio libro Pauli Veneti.